

四庫全書

集部

欽定四庫全書

後村詩話卷七

宋 劉克莊 編

放翁詩云藥來賊境靈何益米出胡奴死不炊上句用
柳公綽事公綽節度山南東道有道士獻丹藥問所從
來曰自薊門時朱克融方叛公綽曰藥自賊境來雖驗
何益棄藥而遂道士殆天為下句設此奇句

甲子七年
讀唐書記

時年七
十八

揚雄集六卷四十三篇劇秦美新之作在焉法言末云
自周公以來未有漢公之懿又曰其勤勞則過于阿衡
此時莽猶未篡此語不過如今人稱頌權貴人功德爾
及莽既篡雄縱不能如許由洗耳魯連蹈海然與龔勝
同時莽使使者以印綬強起勝勝稱病篤卧以手推去
印綬勝兩子及門人進說云云勝曰吾受漢家厚恩今
年老旦暮入地豈以一身事二姓下見故君乎不食而
死雄亦仕漢者莽篡不能去視勝可愧死矣美新之篇

方且盛稱皇帝陛下配五帝冠三王開闢以來未聞宜
命賢哲作帝典一篇襲舊二為三以示罔極又自言有
顛眴病恐先犬馬填溝壑長恨黃泉故作此篇以獻余
謂寧顛眴病死此文豈可作哉朱氏書莽大夫揚雄卒
當其罪矣而昌黎公荆公涑水公皆推重或以配孟子
何也

元后誅畧云天之所廢人不敢支又云皇天眷命黃虞
之孫歷世運移屬在新聖又云漢廟黜廢移安定公凡

累百韻按元后雖莽之姑然擲傳國璽缺其角聞翟義起兵以為是見漢宗廟毀壞有怨言人心之公不可磨滅如此雄士人也顧以賊莽為新聖以漢廟黜廢為天之所壞乎

劉子政集二卷有九歎用騷體末有杖銘云歷危乘險匪杖不行年耆力竭匪杖不强有杖不任顛跌誰怨有士不用害何足言藹蔗雖甘殆不可杖佞人悅已亦不可相杖必取任不必用味士必任賢何必取貴語簡而

有味

文君眉色如望遠山
臉際常若芙蓉十八而寡
悅長卿之才而越禮焉
長卿死文君為誄傳于世

揚雄夢吐鳳凰而作太玄
經仲舒夢蛟龍入懷而作春
秋繁露

公孫弘食故人高賀以脫粟飯覆以布衾賀告人曰弘
內服貂蟬外衣麻屨內廚五鼎外膳一肴于是朝廷疑
其矯焉弘嘆曰寧逢惡賓勿逢故人

吳章為王莽所殺弟子皆更易姓名以從他師惟司徒掾平陵曹敞亦吳章弟子收葬其尸

目睨得酒食燈火花得錢財乾鵲噪而行人至蜘蛛集而百事喜故目睨則呪之火花則拜之鵲噪則餒之蜘蛛集則放之

枚臯文章敏疾長卿制作淹遲而長卿首尾溫麗枚臯時有累句揚子雲曰軍旅之際戎馬之間飛書走檄用枚臯廊廟之下朝廷之中高文大典用相如

安定嵩真玄菟曹元理並明算術成帝時人真自算其
壽七十三綏和元年正月二十五日晡時死書壁記之
至二十四日晡時死其妻曰見其算時長下一算慮脫
有旨不敢告今果校一日真又曰北邙青隴上孤墳西
四丈所鑿之入五尺吾欲葬此地及死往掘得古時空
槨遂以葬焉元理常從其友人陳廣漢廣漢曰吾有二
困米忘其石數子為計之元理以食箸十餘轉曰東困
七百四十九石八升七合又十餘轉曰西困六百九十

七石八斗遂大書困門後出米西困六百九十七石七斗九升有一鼠大堪一升東困不差圭合元理後復過廣漢告以米數元理以手擊牀曰遂不知鼠之殊米不如剥面皮矣廣漢為取酒鹿脯數片元理復笑曰諸蔗二十五區收一千五百三十六枚蹲鵠三十七畝收六百七十三石千牛產二百犢萬雞將五萬雛羊豕鵝鴨皆道其數果蘇肴藪悉知其所曰資業之廣何供饋之福廣漢慙曰有倉卒客無倉卒主人元理曰俎上蒸純

一頭厨中荔枝一拌皆可為設廣漢再拜謝罪自取之
盡日為歡公孫弘為國士所推上為賢良國人鄒長倩
以其貧解衣裳衣之擇所著冠屨與之又贈以生芻一
束素絲一襪撲蒲一枚書遺之曰撲蒲者以土為器以
畜錢具有入竅而無出竅滿則撲之士有聚斂而不能
散者將有撲蒲之敗可不誠歟弘為高賀鄒長倩兩故
人所輕如此豈非曲學阿世有以納侮歟

梁孝王遊於忘憂之館集諸游士使各為賦枚乘為柳

賦路喬如為鶴賦公孫詭為文鹿賦公孫乘為月賦羊
勝為屏風賦韓安國作几賦不成鄒陽代作鄒陽安國
罰酒三升賜枚乘路喬如絹各五匹

自揚雄夢吐鳳以下皆見西京雜記葛洪所集也未云
洪家有劉子駿漢書一百卷無首尾題目但以甲乙丙
丁紀其卷數畝欲撰漢書編錄漢事未詮次而已故書
無定本雜記而已後好事者以意次第之始甲終癸為
十帙帙十卷合為百卷試以此記較班固所作殆是全

取劉書有小異同耳固所不取不過二萬餘言今抄
出為二卷名曰西京雜記以裨漢書之闕爾後洪家遭
火書籍多盡此兩卷在洪巾箱中故得猶在劉歆所記
世人希有縱復有者多不備足恐年代稍久歆所撰遂
沒并洪家此書二卷不知出所故序之云耳

尹少稷詩若淡泊而有義味其庸醫行云南街醫工門
如市爭傳和扁生後世膏肓可為死可起瓦屑蓬根盡
珍劑歲月轉久街轉疎十醫九死一活無北市醫工色

潛動大字書牌要驚衆偏收棄藥與遺方羽客神丹亦
無用實者為虛熱為寒幾因顛倒能全安君不見形神
枵然卧一室醫方爭工藥無必左手檢方右顧金兩手
雖殊皆劍戟似諷當時主和戰者聞逆亮入寇律詩云
本來饑飽非同鼎安得沉浮自一舟又云異日是非憂
史謬終身寒餓美錢愚詞不迫切而意獨至矣少稷及
接呂居仁曾吉甫議論在山中讀書二十年名論極重
晚為大坡因符離之敗攻張魏公父子以附和議遂為

公議所貶甚可惜也頃故人陶木仁父宰上饒余託仁父傳其集四冊詩居其一

漢益州刺史朱公叔卒門人陳季圭議所諡宜曰忠文子陳留蔡邕議曰按古之以子配諡者魯之季文孟懿子衛之孫文公叔文皆諸侯之臣也至于王室之卿大夫其尊與諸侯同故以公配春秋曰劉卷卒葬劉文公公羊傳曰劉卷者何天子大夫也經文曰王子虎卒左傳曰王叔文公卒而如同盟禮也此皆天子大夫得稱

公其禮與同盟諸侯敵之文明也又禮緣情臣子咸欲
尊其君父故雖侯伯子男之臣自稱其君咸得曰公及
其卒異國之人稱之亦然是以邾子許男稱公以葬春秋
之正義也以例言之則府君王室亞卿也有王叔劉氏
之比以臣子之辭言之則有邾許稱公之文雖無土而
其位是也今曰公猶可若稱子則降等多矣懼禮廢日
久將詭時聽周有仲山甫伯陽嘉父吉父賢老之稱也
宋有正考父魯有尼父配諡之稱也春秋曰孔父禮曰

伯其父異亡之稱也父雖非爵號與公同禮天子諸侯咸用優賢異亡順乎門人臣子所稱之宜可於公父之中擇一處焉斯不稱子而已邕此議佳甚韓柳歐曾不能加也邕集十卷大半為人作碑版如橋玄楊秉楊賜皆名臣如朱公叔陳仲弓郭林宗范史雲姜肱皆名士至于劉表胡廣之碑豈得無愧辭乎又有袁滿來胡根二銘滿來太尉之孫司徒之子年十五死根陳留太守之子七歲死二銘甚美幾於諛墓矣

周勰字巨勝汝南人再舉孝廉皆委之去梁冀專國前
後三辟不至後太尉司徒各再辟司空三辟察賢良方
正州舉茂才又公車特徵託疾杜門里巷無人跡外庭
生蓬蒿至延熹二年梁氏滅誅而勰卒園典字叔則探
綜歷數剖纖入冥州郡禮命舉至孝莫之能起李休字
子材南陽宛人綜七經精羣經翫辭察變獨見前識古
今疑義錯謬前人所希論後學所不學休盡割判剝散
幽闇昭爛郡署五官掾司空胡廣以禮優請不至

以上
三八

史逸其事

見邕集

光和元年七月十日詔書尺一召光祿大夫楊賜諫議大夫馬日磾議郎張華蔡邕太史令單颺詣金商門引入崇德殿門惟中設都座中常侍育陽侯曹節冠軍侯王甫從東省出就都座劉寵龐訓北面陽公南面日磾華邕颺西南面受詔書各一道尺一木板草兩常侍又諭旨以朝廷焦心聞災恐懼每訪羣公卿士而各括囊莫肯盡忠規補闕故特密問勿依違生疑諱皆再拜受

詔起就坐五人各一處給筆札邕對蜺墮雞化皆婦人
干政所致乳母趙嬈貨富侔于帑藏丘墓踰于園陵兩
子受封兄弟典郡永樂門史崔玉依阻城社大為奸禍
暗昧已成非外臣所能審處近者不治無以正遠又言
廷尉郭禧國之老成光祿大夫橋玄方直前太尉劉寵
忠實宜為謀主數見訪問邕立朝持論可謂有所補益
然詔問之時兩常侍在都座之側乃不敢指言漢寺人
亦大橫矣

為曹公祠橋玄之使持節丞相冀州牧魏王操謹譴掾
再拜敬祠故太尉橋公公以懿德泛愛博容國念明訓
士思令模靈幽體翳邈哉晞矣幼以頑鄙之質為大君
子所顧猶仲尼之稱顏淵李生之歎賈復士死知己懷
此無忘又承從容要誓言祖逝之後路有由徑不以斗
酒隻雞過相沃醑車過三步腹痛勿怪雖戲笑之言非
至親篤好夫何肯如此辭懷舊雅顧潛然悽愴奉命東
征屯次鄉里北望貴土乃心陵墓則致薄祠公其尚享

董卓上書辭疾乞就國土羣臣表卓上解國家播遷之厄下救兆民塗炭之禍黜廢頑凶援立聖哲謹案漢書蕭何以相國金印綠綬位在公卿之上卓功績誠鉅勲侔伊霍宜以卓為相國位在太傅上帶履上殿入朝不趨此表邕筆也然其罪薄于子雲

缺
子賀周益公致仕啓云清朝無事元老辭榮謂七十致仕當守禮經之常故再三上疏不為文具之語天子重違其意孤傳以華其歸喜見顏間甚於擢患去之日身居物外忘其

為三公之尊解后遂得初心毫髮畧無遺恨恭惟某官
棲遲盛福俯仰太平開閣求賢留作國家之用銜盃樂
聖退全明哲之身甫念禮在于懸輿已聞冠掛于神武
雖是翁矍鑠皆意其復相使此老婆娑是負其平生二
者豈可得兼萬事知其皆足是關學力難與婦謀昔蜀
公年未至而居貞路公耄已及而當國從其所好匪道
之常又豈仕止合聖人之時出處全君子之致方尋同
社共樂餘年玩象戲于橘中焉知老至作龜巢于蓮上

但見花開某夙仰高風驚聞盛舉觀終始之一節知壽
考之百年昔嗟林下之無人今喜山中之有相涼臺嶼
館益知綠野之清閒角扇長壺雅願洪崖之灑掃云云
此作佳甚然為詩名所掩故不甚流傳著有竹隱集十
一卷多其舊作暮年詩無棗本諸詩如見石湖放翁誠
齋一輩人又才氣飄逸記聞精博警句巧對天造地設略不
戟人喉舌費人心思品在姜堯章諸人之上集中及晚
作尤佳者昔已入絕句詩選今摘其警句于後曉梵魚出聽

夜禪石點頭

贈于進夫

胸中著雲夢皮裏有陽秋 自作先

生傳誰為故吏碑

挽錢觀

馬上村坊酒眉尖野店茶

肩成山聳因尋句眼作花昏為勘碑

陳宣子求碑

天寒不

知翠袖薄日煖但覺玉煙生

水仙花

黃四娘花空朵朵

謝三郎鬢已蒼蒼

燕生

索醉寧傾問字酒忍饑不取作

碑錢 駒入隙來元不礙蠅鑽紐出定何妨

紙闌

化成

銀地佛應喜移下玉樓天不知

雪

北風萬籟自宮徵

南日一軒真袴襦

南日

但欲有衣存妓妾不愁無帳列

生徒

明簾

劉顯貴為天子友退之窮作相君書

王士禎以布衣

自命

我本田家子驅來作長官政雖無小異民却自相

安靜或焚香坐閒因展畫看庸人擾之耳只道太和難

巢餘太古雪人有正始風頭如雪絮白面作春桃紅

題雪

巢

一鞭加爾膚萬刃割吾腹就令猛于虎何忍食子

肉世無冷鑊湯邑盡活地獄

裴太和米綱

老覺此身無一

堪尚牽詩課撚衰髯亦知庭院西風惡直為秋香不下

簾

秋

一瓶儲粟一囊錢兒欲箕裘女紡塲更買小丘

吾事畢勘書評畫了殘年 可憐玉雪不供愁似缺

此君雖強項歲寒相對却風流

瓶中梅竹

以缺

鼇笑螻蛄冠山戴粒合逍遙

范石湖

不識廬山

孤負目不食螳螂孤負腹亦知二者古難兼行到九江

吾事足巾墊雨佩飛霞

缺

嘲攻墨守墨 通明

殿不夜城雪

三雅六經

趙德莊送酒注劉表有酒爵三大伯雅次仲雅小季雅

侯鯖錄陶人為酒器有酒經晉安人餉人以酒書云酒一經或二經至五經它境人不逢聞餞五經束帶迎門

方知是酒也

大官連檣十萬艘小官僅得一葉如漁舫其

中何所有白髮翁媼并兒曹赤脚婢三後執爨蒼頭奴
二前操籌玄真筆牀間茶竈吏部酒盃兼蟹螯書緘一
箱半魚蠹一束百軸成牛腰平鋪藁桔薦猫犬贖買棗
栗供猿猱新花鬱屈作萎木清酒蕩搖成濁醪蓬低日
覺巾角折竈近時聞金羹輾高驤正難望鷁首緩進豈
敢爭龍標全家窘拘嘆蹉跎長物屏當隨週遭桑樞駟
馬各是累猪肝薇蕨俱成餐不須彼此更相笑未必鬱

林之石賢胡椒

舟行

斷貪鞅解見縛壞想宅絕迷道摧慢幢拔感箭徹睡蓋
裂愛網上彌勒佛讚善財告諸人者此長者子為被四
流漂泊者造大法船為被見沉沒溺者立大法橋為被
癡暗昏迷者然大智燈為行生死曠野者開示聖道為
嬰煩惱重病者調和法藥為遭生老死苦者飲以甘露
令其安穩為入貪恚癡火者沃以定水使得清涼又云
何為菩薩究竟施佛子此菩薩假使有無量衆生或有
無眼或有無耳或無鼻舌手足來至其所告菩薩言我

身薄佑諸根殘缺惟願仁慈以善方便捨已所有令我具足菩薩聞之即便施與假使由此經阿僧祇劫諸根不具亦不心生一念悔惜但自觀身從初入胎不淨微形胞段諸根生老病死又觀此身無有真實無有慚愧非賢聖物臭穢不潔骨節相持血肉所塗九死常流入所惡賤作是觀已不生一念愛著之心復作是念此身危脆無有堅固我今云何而生戀著應以施彼充滿其願如我所依以此開導一切衆生令於身心不生貪愛

悉得成就一切知身是名究竟施

施歲

譬如乘船欲入大

海未至於海多用功力若至海矣但隨風去不假人力

以至大海一日所行比於未至其未至時設經百歲亦

不能及至微細罪生大怖畏以忿恨風吹心識火

熾然不息凡所作業皆顛倒相解脫長者告善財善

男子應以善法扶助自心應以法水潤澤自心應以境

界淨治自心應以精進堅固自心應以忍辱坦蕩自心

應以智證潔白自心應以智慧明利自心應以佛自在

開發自心應以佛平等廣大自心應以物十力照察自

心

以上見
華嚴經

李格非字文叔濟南人詩文四十五卷文高雅條鬯有
義味在晁秦之上詩稍不違元祐末為博士紹聖始為
禮部郎有挽蔡相確詩云邴吉勲勞猶未報衛公精爽
僅能歸豈蔡常汲引之乎挽魯直五言八句首云魯直
今已矣云云以下所作六句亦無褒文叔與蘓門諸人
尤厚其歿也文潛至其墓獨於山谷在日以詩往還而

此詞如此良不可曉其過臨淄絕句云擊鼓吹竽七百年臨淄城闕尚依然如今只有耕耘者曾得當時九府錢試院五言云斗暄成小疾亦稍敗吾勤定是朱衣吏乘時欲舞文亦佳作文叔李易安父也文潛誌云長女能詩嫁趙明誠

文叔祭淇水文云惟先生自詩書以來載籍所記歷代治亂及九流百氏凡一過目確不能忘其發為文章則泛而汪洋密而精緻修然高爽斂然沉毅驟肆而穩忽紛而治絕馳者無遺影適淡者有餘味如金玉

之就雕章湖海之失涯溪雲煙之變化春物之穠

麗見之者不能定名學之者不能髣髴筆勢畧與淇

水相頡頏

缺

詩深精可諷味初至象郡五言

云裨海環

缺

國世人

缺

兩足遽欲窮畛域

心知禹分土未盡舜所陟吾遷桂

缺

仰

缺

見斗極

升高臨大路郵傳數南北山川來

缺

草樹畧已識拔

狀歸夢長鄉時行歷歷又云去日有近遠寒暑乃

不同手捉而喙飲嗜欲南北通是邦亦洙泗人可牛與

弓良知盡虛市妙質老耕農彼時張曲江此時余襄公
二子稍脫穎一洗凡馬空斯文隔裔土後生昧華風闕
缺要常袞劍外須文翁又云秦扁不南游醫方畧嵐瘴
茅黃秋雨淫與瘡蓋同狀呪師烏能神適市半扶杖吾
欲養黃婆母壯子亦王妙藥只眼前乞汝保無恙又云
居近城南樓步月時散策小市早收燈空山晚吹笛兒
呼翁可歸恐我意慘戚從來堅道念老去倦形役蒼天
卒相予體以南荒謫宴坐及此時聊觀鼻端白絕句云

步屨江村霧雨寒竹間門巷擊黃團尤嫌骯髒驚魚鳥
父老相呼擁道看八尺方牀織白簾含風漪裏睡曾騰若
無萬里還鄉夢便是三湘退院僧南遷後四六比向來兩
制尤高簡精妙缺 曰狄仁傑何如曰粗覽經史薄閑
文筆箴規切諫缺 風晚有錢癖和嶠之徒

魏元忠文武雙闕名實兩空外示貞剛內懷趨附

李嶠有三戾性好榮遷憎人升進性好肥鮮綺羅斷人
食肉衣錦性好行房憎人畜聲色

唐儉事太宗甚蒙寵遇每食非儉至不食數年後特憎之遣謂之曰更不須相見見即欲殺隋文帝重高顯初甚愛後不願見見之則怒

薛師有巧性常入宮闈補闕王求禮上表曰太宗時羅黑能彈琵琶遂闈為給使以教官人今陛下要懷義入內臣請闈之宮闈不亂表寢不出

少府監裴匪舒奏賣苑中官馬糞歲得錢二十萬貫劉仁軌曰恐後代稱唐家賣馬糞遂寢

宗楚客諂薛師釋迦重出觀音再生

尚書左丞張庶廉子利涉為懷州參軍刺史鄧惲曰名
父出如此物

楊炯為文好以古人姓名聯用號為點鬼簿駱賓王文
好以數對號為算博士盧生之文古今繁繁文質彬彬
惜哉不幸有冉耕之疾為幽憂子以釋憤焉

李詳初為劍南一尉言刺史書考不平又曰請考使即
下筆曰怯斷大事好勾小稽自既不清疑人總濁考中下

張易之昌宗目不識字手不解書謝表及和御製皆附
者為之所進三教珠英乃崔融張悅輩之作而易之竊
名為首

逆韋詩什並上官昭容所製昭容上官儀孫女博涉經
史研精文筆班婕妤好左嬪無以加

賀蘭敏之為封東岳碑張昌齡所作也劉子書咸以為
劉勰所撰乃渤海劉晝所製晝無榮位博學有才故取
其名人莫知也

進士章弘知詩君為河畔草逢春心剝生妻如臺上鏡
得照始分明同房常定宗改始字為轉字遂爭此詩皆
云我作博士羅道琮判云昔五字定表以理切稱可今
一言競詩取詞多為主詩歸弘知轉還定宗張狗兒愛
偷文章時為之語曰活剝王昌齡生吞郭正一

駱賓王帝京篇倏忽搏風生羽翼須臾失浪委泥沙冉
閔殺胡人高鼻者橫死董卓誅閹人無鬚者枉戮梁武
帝使喚搥頭師帝方與人棋欲下一段子應聲曰殺却

使出斬之棋罷喚師入使曰陛下令殺却臣已殺却訖
帝嘆師臨死何言曰師云貧道前生為沙彌以鋸剗地
誤斷一曲蟠今此報也帝流涕無及

民部尚書唐儉與太宗棋爭道上大怒出為潭州蓄怒
未洩謂尉遲敬德曰唐儉輕我我欲殺之卿為我證論
有怒言指斥敬德唯唯明日對仗云云敬德頓首臣實
不聞頻問確定不移上怒碎玉筵於地奮衣入良久索
食引三品以上皆入宴上曰敬德今日利益者各有三

唐儉免枉死朕免枉殺敬德免曲從三利也朕有恕過之美儉有再生之幸敬德有忠直之譽三益也賞敬德一千段羣臣皆稱萬歲

魏元忠忤二張出為端州高要尉二張誅入為兵部尚書中書令左右僕射不能復直言古人有言妻子具則孝衰爵祿厚則忠衰

三狗俱用覺魏祚之陵夷五侯並封知漢圖之圯缺周公孔子請伏殺人伯夷叔齊求承行刼牽牛付虎未有

出期縛鼠與猫終無脫日

酷吏 以上二十二
則並見朝野僉載

左思白髮賦云星星白髮生於鬢垂雖非青蠅穢我
光儀策名觀國以此見疵將拔將鑷好爵是縻白髮
將拔慙然自訴稟命不幸值君年莫偁迫秋霜生而
皓素始覽明鏡惕然見惡朝生晝拔何罪之故予觀橘
袖一皤一昱貴其素華匪尚綠葉願戢子之手攝子之
鑷咨爾白髮觀世之途靡不追榮貴華賤枯赫赫閭閻
謁謁紫盧弱冠求仕童髻獻謨甘羅乘軫子可剖符

英英終賈高輪雲衢拔白就黑此自在吾白髮臨拔瞋目號呼何我之冤何子之娛甘羅自以辯慧見稱不以髮黑而名著賈生自以良才見異不以烏髮而後舉聞之先民國用老成二老歸周周道肅清四皓佐漢漢德光明何必去我然後要榮浴爾白髮事故有以爾之所言非不有理曩重耄老今薄舊齒皤皤榮期皓首田里雖有二毛河清難俟隨時之變見嘆孔子髮乃辭盡誓以固窮昔臨玉顏今從飛蓬髮膚至昵尚不克終聊用擬辭

比之國風

後村詩話卷七

欽定四庫全書

後村詩話卷八

宋 劉克莊 編

陶弼商翁與楊畋樂道同時一生仕宦廣西晚守欽順
二州集中多佳句前已采其一二它五言如塞上云星
落胡王死河窮漢使歸雪山經夏冷天馬入秋肥觀教
戰云晉興由師讓楚敗以師喧行役云陰微辨樵火霽
早誤僧鐘雜詩云久聞忘將畧多病熟醫書順州云渴

蜂銜研水饑蝶嗅屏花七言汴河云柳與揚州今獨在
水和隋帝不重來柳州云人心如地少平處天氣似春
無冷時送人云冷酒十分無客送輕車一兩有民攀又
云兵堪渡海將軍老史不占天處士閒村行云路小馬
蹄高復下村深雞唱有如無

李鴈湖詩程滄州守宜春刊于郡齋余不及識公初筮豫章及
公謫居臨川從曾極景建得余詩簡景建云劉君詩兼鮑庾之
清俊前與其父同舍不知其郎君詩筆如此曉得宜春本摘其警語

一二于此紅梅云晚覺鄭公殊嫵媚生憎夷甫太鮮明
送楊子直知吉州云憂時鐵石孤忠在閱世風花老眼
空酬景建云新有千絲明曉鏡舊無一畫贊宵衣閒吟
此外惟須飲老覺人間萬事非又云向來交態雲翻手
靜裏玄言石點頭鴈湖注半山詩甚精確其絕句有絕
似半山者已采入詩選矣如平生閱世朦朧眼偏向白
鷗飛處明如鴉健觸翻紅簌簌鷗閒占斷碧粼粼皆可
諷味如金谷友玉川奴鷓鴣賦蛺蝶圖雙蓬鬢寸草

心鷺友鴈奴鷗客蟹奴皆的對

于湖讀中興碑云繡綳兒啼思塞酥重牀燎香驅羣胡
阿環錦襪無尋處一夜驚眠搖帳柱朔方天子神為媒
三郎歸來長慶樓樓前拜舞作奇崇中興之功不贖罪
日光玉潔十丈碑蛟龍盤擎與天齊北望神臯雙淚落
祇今何人老文學題蔡濟忠所摹御府米帖云生前官
職但執戟身後一字萬金直當時雷電下收拾世間不
復有遺逸整整十卷字猶濕光采激射海為立平生我

亦有書癖對此懽悅心若失口吐汗下屢嘆息十日把
玩不得食作牋天公拜稽首乞我此老生時一雙手為
君痛飲百斛酒池如江筆如帚一掃萬字不停肘

石徂徠讀石安仁

曼卿舊
字安仁

學士詩云齊梁無駿骨李杜

得秋毫後世益纂組變風堪鬱陶奔道少驥逸禿冗如
牛毛試看安仁詠秋風有怒濤徂徠力排楊劉而推重
曼卿如此但前云駿骨後又云驥逸何也寄張從道云
臘盡妻未褐天寒子讀書寄明復先生云殘書幾篋蠹

寒菊半籬荒惟學春秋者時時到草堂殊有魏野林逋
氣格

徐淵子詩用紡塲字斯干詩載弄之瓦注云紡塲也說
苑亦云和氏之璧千金之寶用以間紡不如瓦塲

癸未甲申余自桂林入都改秩一日自外歸逆旅主人云有
二客訪君不遇留刺而去視之蓋高續古鍾春伯二館
職也皆素昧明日往謝高云吾於陸伯敬處見子某詩
鍾云吾於南塘處見子四大相約訪君共論此事何相

避之深也鍾惠四六一卷高遺疎寮詩二冊未幾鍾貴
顯高出館不復入今皆物故余老矣四六姑置惟詩結
習未忘所得疎寮二冊前已摘出一二聯後得其全集
數倍于舊老筆如湘絃泗磬多人間俚耳所未聞者有
石湖放翁誠齋之風部帙既多不能遍閱姑錄其警語
于編以備遺忘五言楊嗣勛惠荻苓云道是青神谷元
通白帝厓有松如壯士其鼻化嬰兒雲濕侵鷗嘴天寒
翦兔絲堯初香摘髓秦後雪凝脂穴動龍蛇窟山空鳥

獸悲惟將千歲力自了一生奇送潘德廊師廣云風穩
琛舟引春明丹服衙謁吳給事云上皇今百歲近侍不
多人寄僧云鹿采花修供援分石坐禪別僧云夢無全
覺久詩只半聯奇聽雪云竹大時聞折梅明不受靈雜
詩云今古憑詩了乾坤賴酒澆忙猶輪使硯懶尚事持
茶買研云汾獻升雲鼎秦遺蝕雪碑曹娥江云沙冷鴉
一二天長帆有無七言送蜀客云峨眉雪罷添巴水玉
壘雲空見蜀星白浪不侵魚復陣青苔猶護劍關銘題

放翁誠齋倡和云題徧鮫綃乾碧海吹將鶴笛上青天
道山堂前梅花云太乙神仙遊冊府秦王學士憑欄干
懷墅云已是飛來鸚鵡了可能落到牡丹花讀漫郎詩
云東西都漢猶司馬三百年唐只次山答人云晉書好
傳偏安石唐世諸人且樂天送歙守云龍尾石須分幾寸
牡丹花不望頭綱池西云旋作池來分剝曲略教花處
似蘇堤梅花云相依豈恨移來晚欲訴猶須說到明絕
句尤多佳者都下云柳生春思拂京華不管閒人也憶

家添盡好香那睡得月痕如水浸梨花中秋夜登秀臺
二絕云青冥風露無人管醉力飛昇入桂臺月過斗西
親挽住伴人騎鶴去蓬萊冰娥看盡人間世好事如公不
數來却喚清壘相揖酌汝聽下界息成雷梨花詞云殿
頭推引上清華獨奏春詞唱賜茶帶月歸來仙骨冷夢
魂全不到梨花晚泊江口云白鷺青煙剡江口梅六七
分經雪後月肯流連相伴酒隔岸呼船有魚否五言古
體幼安云青天不惜日壯士偏知秋自古有奇畫如今

空白頭彼時當再來吾老不可留天推壁上星入銀
河流躔度若此急人生與之浮終夜自起舞無人共登
樓典謨有陳言河洛非故州黃鶴呼不來誰能理殘裘
此篇甚高古

杜讎伯高題蘭亭序云君勿笑新亭相對泣却勝蘭亭
暮春集白頭吟云長門作賦直千金不知家有白頭吟
二詩皆有味

王元澤詩不滿百度關山篇云萬馬度關山關山三尺

雪馬盡雪亦乾沙飛石更裂歸來三五騎旌旗映雲滅
不見去時人空流磧中血古樂府無以加春懷云朝日
上屋角百鳥鳴不休豈復辨名字但聞鬧鈎輶亂我讀
書語驚我夢寐游彎弓彈使去暫去還啾啾彈十不得
一丸窮來愈稠拔弓坐榻上咄咄空自尤時節使汝鳴
我何為汝讎絕句云一雙燕子語簾前病客無聊盡日
眠開徧杏花人不到滿庭輕雨綠如煙霏微細雨不成
泥料峭輕寒透夾衣處處園林皆有主欲尋何地看春

歸殊有乃翁思致

獵較集前已摘數聯晚溫故讀再錄昔遺忘者七言雪中云但能閉戶酌季雅安用馭風尋伯昏種蕪菁作羹云且喜蕪菁種得成臺心散出碧縱橫脆甜腍子無反惡肥嫩羔兒不殺生樂羊豈斷兒孫念劉季寧無父子情爭似野人茅屋下日高淡煮一杯羹歷世云面朋面友風雨散山鳥山花淡薄交一榻攬毬容獨卧滿枰杞菊是蕪有五言云天寒猶著絮雨濕欲蒸書吳地人情

薄西人客計疎無書堪著眼有法可安心絕句云誰倚
黃旗喚阿瞞令君終作可憐人蕭然唯有鹿門老不帶
孫劉一點塵輕陰小雨晚難收柳瘦梅窮却是秋可恨
水仙花不語無人共我說春愁春怨云梨花雨送海棠
風不惜臙脂作小紅幾日無人吹玉笛鴛鴦飛入館娃
宮此老筆力有謫仙風骨集中有云老鶴悔拋青嶂裏
客星倦倚紫微邊又云而今心服陶元亮作得人間第
一流豈非深悔晚出之誤歟

滿山集多不經人道語此公讀書多氣老筆適題顏魯
公像云千五百年如烈日二十四州惟一人朝衣視坎
趨前死羽服行山即此身與客晚集云足下一來同晚
步先生小住待村春春晴云四野綠迴春補闕亂山塵
淨雨修容懶軒云經年不濯子春足半月纔梳叔夜頭
止酒云搢紳處士議所以將軍貴人須畢之月夜云疏
璃虛空甚圓滿紫磨山川更新鑄梅花絕句云姑射山
頭冰雪仙人間一見便豐年却應羞死琴臺女不得乃

金瓶梅詞話卷八
翁分一錢荷珠云客來竊勿令觀此意汝猶能困伏波
如大槐小草木偶芻靈朝采夜光立豹蹲鴟口伐手談
木上座麴先生千金子萬玉妃童欺我老農報予春下
岩研正焙茶昏的對

王逢原集張巡篇云祿兒射火燒九天鬼手不撲神聽
梅羣庸仰口不肯唾反出長喙噓之燃睢陽城窮縮死
鼃危繫一髮懸天淵巡嗔睨遠兩皆折怒嚼齒碎鬚張
肩恨身不毛劍無翼不能飛去殘賊嚙翁軀腥刀兒磔

俎日嚼肉血猶經年霽雲東攘兩臂去西來才有九指
還胃中憤氣吐不散去隨箭入浮屠塼忠窮智索莫自
效更嚮愛妾常饑涎我疑沒日賊不食恐其肉醢死不
痊又疑身骨不化土定作金鐵埋重泉何時山移陵谷
變發出鼓鑄戈或鋌吾如得之願有用不誅已然誅未
然此作出盧仝上交難贈杜漸云兩鼠共謀渴相飲期
入水一鼠下繩缶一鼠上街尾前鼠以之跌後鼠以之
死鼠死何足噫夫人纔可悲平地把手笑乘崖撥足擠

賊防易為力壯健完牆籬交防難為人笑面惡肝脾前
日信其是今日悟其非安得先知明有如灼火龜然則
奈之何期子同吁噦此必有為而作誰氏子云弱弱誰
氏子鮮鮮一何妹來奔富人家妻與富人俱嚴粧問夫
子我豈彼室如夫子笑遣之彼寧與汝都升堂由阼階
德色溢以舒親賓不敢笑退語相噦吁高堂聚羣婢唯
諾相恣睢家事忽不圖顧指取自如朝令折桂薪暮
遣藩籬除風雨半夜來百疊生不虞屋壓盜隨至夫死

別嫁夫東鄰有淑子性不事鉛朱端居待人求正色不
願諛清鏡見白髮行媒不顧問不知愛妻人取捨何異
歟詞意似王建張籍哭詩云目雖淚所出由來心乃源
白日照我面意欲乾沈瀾而不照我心我淚何由乾况
重在雲遮使我何自安又云目存多所見不若無目完
山中云山中亦有出山路山人自不與世通拂衣起行
飲流水枕書就卧聽松風地寬江河競搖蕩天濶日月
爭西東乾坤自為四時後萬事不到幽人甯集中新意

快句不可勝紀如舟方乘兮人不吾以覆且溺兮我同人死東蒿為楫擣為柱居者略不憂其顛吾觀世之陷此者不啻火立足回燔豈期

缺

既自悟不思跳出乃

欲

缺

井方崩兮治隧屋且

缺

雕楹傾江竭河論麴

水都投大海為酒池中間

缺

不盈掬日益醞釀成澆

漓不知淳風竟何適萬

缺

齊舉招不迴五言云清醒甘

澤畔富貴奈璫間劍

缺

終羞屈蘭遺不改香其論文云

星緯織成副地錦歐冶鑄出春天矛文章日組緯玉機

飛金梭誰有真缺繩結作張麟羅老成終到孔窮死亦

為顏不能繩缺怠何力禁人叛不知里社歌不可郊廟

施梅花云缺知後世無所用兒嚼不美還棄之贈王平

甫云古人誰云朽死魄如可召其詠物馴鹿云祇消指缺

馬相有迹原人豺狼好爪牙應笑角如麟水車云上潤

雖已然下竭將奈何鴈云關塞風高夜江湖木落秋鳶

云纔乘一綫憑風去便有愚郎仰面看春雪云缺戶開

重瑾冰魚上復沉東園云天桃未老已抽青缺畧朱旗

冠翠纛雖然素李不爭華似洗朱丹誇瑩缺余昔讀廣陵集草草用朱筆點出妙處子修弟手錄余所點者于冊晚見子修所抄老矣又偏盲不能寫成冊子遂再選一番本朝諸人惟逢原別是一種筆墨如靈芝慶雲出為祥瑞半山崛起于歐蘇無所許可非苟歎伏後生者逢原集中有呂吉甫所答五言云東海有滄溟西極有崑崙子已具舟車吾亦為檝輪吉甫能為此言豈非近朱者赤耶

方豐之德享父呂紫微文游放翁序其詩梅花云天女
終降大居士登伽惟撓小乘禪又云老夫六賊銷磨盡
時為幽香一敗禪漁父云已攜巨鯉換新杭尚有鱖魚
得自烹聞道烹鮮易煩碎呼兒無用苦和羹歷崎道中
云漠漠春陰接海低濛濛晚雨傍山飛半散古埭無人
過時有村童護鴨歸海口云白是石渠青是麥誰云斥
鹵不堪田五言云魂夢無金印生涯有瓦盆

楊大年西崑訓唱集序畧云予景德中忝佐修書時紫

微錢君希聖秘閣劉君子儀竝負懿文尤精雅道予得以遊其塲藩而咨其模楷因以歷覽遺編研味前作更迭唱和互相切劘入蘭遊霧雖獲益以居多觀海學山歎知量而中止雖榮于托驥亦愧乎續貂得五七言律詩二百四十七章其屬而和者十五人析為二卷取玉山策府之名命之曰西崑酬唱集今考十五人者丁謂刁衍張詠晁迥李宗諤薛陳缺越李維劉鵬舒推崔遵度任隨錢惟濟有名秉缺不著姓王沂公只有一篇在

卷末

放翁長短句云元知造物心腸別老却英雄似等閒祕
傳一字神仙訣說與君知只是頑一句丁寧君記取神
仙須是閒人做君記取封侯事在功名不信由天元來
只有閒難得青史功名天却無心惜漁父詞云一竿風
月一蓑煙雨家在釣臺西住賣魚生怕近城門况肯到
紅塵深處潮生理權潮平繫纜潮落浩歌歸去時人錯
把比巖光我自是無名漁父鷓鴣天云杖屨尋春苦未

遲洛城櫻筍正當時三千界外歸初到五百年前事總
知吹玉笛渡清伊相逢休問姓名誰小車處士深衣叟
曾是天津共賦詩好事近云混迹寄人間夜夜畫樓銀
燭誰見五雲丹竈養黃芽初熟春風歸從紫皇遊東海
宴賜谷進罷碧桃花賦賜玉麈千斛又云平旦出秦關
雪色駕車雙鹿借問此行安往賞清伊修竹漢家宮殿
却灰中春草幾回綠君看變遷如許況紛紛榮辱朝中
措云怕歌愁舞懶逢迎粧晚託春醒總是向人深處當

時枉道無情關心近日啼紅密訴剪綠深盟杏館花陰
恨淺畫堂銀燭嫌明情知言語難傳恨不似琵琶道得
真其激昂感慨者稼軒不能過飄逸高妙者與陳簡齋
朱希真相頡頏流麗綿密者欲出晏叔原賀方回之上
而世歌之者絕少項平庵祭辛幼安文云人之生也能
致天下之憎則其死也必享天下之名豈天之所生必
死而後美蓋人之所憎必死而後正嗚呼哀哉死者人
之所惡公乃以此而為榮予者公之所愛必當與我而

皆行句旦暮而相從固予心之所愛尚眠食以偷生恨
公行之不待自昔哀詞未有悲于此者

平庵五言絕句武夷鐵笛亭云夜嘯千崖裂朝吟萬象
蘓山人大自在無淚捋君鬚諸葛祠堂云羽扇白綸巾
堂堂六尺身我觀秦漢下宇宙只斯人永州云日日長沙
岸看雲只念家如何永州夢偏愛在長沙欸乃曲云靄
迺出深溪湘山日落時若非堯女哭即是楚臣啼雜五
言如隆中評劉牧云阿瑋去梯策尚識抱膝公誰云豚

犬愚頗復勝乃翁又平生萬事偽惟有病是實時方攻
偽其言如此

六言和王仲衡尚書云聖賢生世不數文章何代無人
一言蔽思無邪三萬辭曰若稽

七言八句讀三國志云曹劉有志混華戎無奈吳兒兩
炬紅赤壁焰燒雲夢澤夷陵光照永安宮人間生此鼎
三足天上無因日再中惟有葛公心未死夜深寒月照
孤忠路傍有因梅竹以編籬者云已生野外更籬根仍與

蚩氓補斷垣博士低頭乘虜障王姬掩面嫁烏孫風枝
雨葉無生意粉面朱脣有淚痕說與調羹吹律事老農
那信腐儒言雜七言如送水心淮東總領云藍縷疾耕
家四壁鐵衣高臥日千金四朝餉士前無古一旦和戎
患至今如送邕州高教授云君行回鴈前頭路我上杜
鵑無處船夔州永安宮云吳王解掩夫羞面難繫劉郎
一寸心

公瑾欲以子女
玉帛繫先主

送陳止齋納官還鄉云正爾釣

絲江上去依然羽扇篋中情藏禿筆云莫欺貧士無

缺

施時向文房度上僧澗上云全家寢食淙琤上韶濩聲
中過百年和人云窻中見日知晨暮瓶裏看花記歲時
新讀子書多乙者舊吟詩稿盡丁之詠拋毬云綵毬丹
柱倚春風寒食清明罷繡工漢北將軍貪蹋鞠豈知兵
法在吳宮

七言絕句春日堤上云高高下下十五里白白紅紅千
樹花總在疎籬斷垣裏背堤臨水小人家見梅云草枯
葉脫四山童萬里長天一日空數點寒稍著紅藥人間

驚喜見春風次韻羅鄧州送別云江上相留不肯留渡
江沿岸却回頭漢江東去人西去不見高城始是愁滁
州路口小雨云三十年前過此時一雙青髻綰青絲如
今舊雨猶相記只傍星星白處吹落帽臺云千山搖落
萬林空數點黃花酒盞中半破接籬誰耐管已將身世
付西風分明屈子獨醒愁故作南華醉夢游豈是晉人
真愛酒渠儂心事更悲秋上冢云兒時飛鞚得金堤掣
電驚風過馬蹄今日筍輿搖醉憤城東一日到城西

與潘德久倡和糟螯詩押險韻至六首皆新奇而首篇
尤工大戴笑汝無穴空雙螯小戴笑汝有筐如子臯太
玄笑汝長郭索入穴慚蟪蛄升慚猓知心但有畢吏部卧
起與汝同酒糟後來愛者蘇長公亦只許汝中山醪固
知合向一丘老安得上與三辰期長公貌喜心未敬雖
羨微生猶惡饗我疑吳儂修稻怨和林醢汝償民膏雖
然因此得長醉痛貶未必非深褒又疑畢叟妬劉掾曾
以螟蛉輕二豪故回左手就箕踞持螯藉糟成兩高

石湖詩三十四卷五言如思陵挽詞云寇降千獍獠胡
拜兩單于首山銅鼎就前殿玉卮空病中云目眚浮珠
珮聲塵籟玉簫注水瓶花醒吹薪鼎樂潮丙午元日云
童心仍竹馬暮境勿蒲輪春晚云繡地紅千點平橋綠
一篙棟花來石首穀雨熟櫻桃詠懷自嘲云退閒驚客
至衰懶怕書來挽趙密太保云鬢凋猶陞戟心在惜殘
弓

六言久病或勸遊適云羸如蓍婦多忌倦似田翁作勞

玩具僧梳肘屨懽棕丁尾龜毛請息齋云洞門畫掛鐵
鎖閣道秋生綠苔著下畧同龜伏瓜中且免蠅來又云
勞君敬枯木耳恐汝見溫灰焉

七言發合江云船尾竹林遮縣市故人猶自立沙頭將
至吳中云新事畧從年少問故人差覺坐中稀玉麟堂
會客云不用忙催銀燭上醪醕如雪照黃昏秋晚閒吟
云旁若無人鼠飲研麾之不出蠅登盤丙午新正云病
憐抑栗隨身慣老覺醪醕到手遑又云人情舊雨非今

雨老境增年是減年口不兩匙休足穀生能幾屐莫言
錢行營壽藏云縱有千年鐵門限終須一箇土饅頭偶
書云已甘搢搢勤為圃休向滔滔苦問津親鄰招集強
往便歸云氣衰况復三而竭心賞尤于四者難一龕云
與老有情冬後煖去仙無幾日高眠

七言絕句昌化云翠染南山擁縣門一洲橫截兩溪分
長官日永無公事卧聽灘聲看白雲長沙王墓云英雄
轉眼逐東流百戰工夫土一杯蕎麥茫茫花似雪牧童

吹笛上高丘處州鸞花亭云山碧叢叢四打圍煩將舊
恨訪黃鸝纈林霜後黃鸝少須是愁紅萬點時續長恨
歌云別後相思夢亦難東虛雲路海漫漫仙凡頓隔銀
屏影不似當年取次看楓橋云朱門白壁枕灣流桃李
無言滿屋頭牆上浮圖路旁堠送人南北管離愁次韻
陸務觀云離合紛紛怕遠遊遠遊仍怕賦登樓何須一
望三千里望盡西州轉更愁田園雜興云騎吹東來里
巷喧行春車馬鬧如煙繫牛莫礙門前路移繫門西碌

礮邊汙萊一稜水周圍歲歲蝸廬沒半扉不著芟青難
護岸小舟撐取葑田歸槐葉初勻日氣涼葱蔥鼠耳翠
成雙三公只得三株看閒客清陰滿北窓采菱辛苦廢
犁鉏血指流丹鬼質枯無力買田聊種水近來湖面亦
收租古鼎作香爐云雲雷紫帶古文章子子孫孫永奉
常辛苦勒銘成底事如今流落管燒香

石湖長短句醉落魄云馬蹄塵撲春風得意笙簫逆款
門不問誰家竹祇揀紅糝多處燒銀燭碧雞坊裏花如

屋燕王宮下花成谷不須悔唱陽關曲直為海棠也
合來西蜀南柯子云悵望梅花驛凝情杜若洲香雲低
處有高樓可惜高樓不近木蘭舟絨素雙魚遠題紅片
葉秋欲憑江水寄離愁江已東流那肯更西流又春若
有情春莫去花如無恨花休落

茶山詩十五卷九百一十篇者是也續刊後集亦十五
卷然中間多泛應漫與者前輩所作猶自刪其半令人
乃並存而不削欲其行世難矣

稼軒五言絕句元日云老病忘時節空齋曉尚眠兒童
喚翁起今日是新年偶題云逢花眼倦開見酒手頻推
不恨吾年老恨他將病來七言云錯處真成九州鐵樂
時能得幾鉤緇酒腸未減長鯨吸詩思如抽獨繭絲皆
佳句然為詞所掩

後村詩話卷八

欽定四庫全書

集部
後村詩話卷九

詳校官石中允_臣薩敏

主事銜_臣徐以坤覆勘

總校官編修_臣王燕緒

校對官編修_臣勵守謙

謄錄監生_臣劉贊化

欽定四庫全書

後村詩話卷九

宋 劉克莊 編

陳拾遺感遇詩云微月生西海幽陽始代昇圓光正東
滿陰魄已朝凝太極生天地三元更廢興至精諒斯在
三五誰能徵又云蘭若生春夏芊蔚何青青幽獨空林
色朱槿冒紫莖遲遲白日晚嫋嫋秋風生歲華盡搖
落芳意竟何成又云蒼蒼丁零塞古今緬荒途亭堠何

摧兀暴骨無全軀黃沙暮南起白日隱西隅漢中三十
萬曾以事匈奴但見沙場死誰憐塞上孤又云樂羊為
魏將食子殉軍功骨肉且相薄他人安得忠吾聞中山
相乃屬放麕翁獸猶不忍殺況以奉君終又云市人矜巧
智于道若童蒙傾奪相夸侈不知身所終曷見玄冥子
觀世玉壺中杳然遺大地乘化入無窮又云吾觀龍變
化乃知至陽精石林何冥密幽洞無留行古之得仙道
信與元化并玄感非象識誰能測淪冥世人拘目見酣

酒笑丹經崑崙有瑤樹安得采其英又云白日每不
歸青陽時暮矣茫茫吾何思林卧觀無始衆芳委時晦
鷄鳴悲鳴耳鴻荒古已頽誰識巢居子又云吾觀崑崙
化日月淪洞冥精魄相交構天壤以羅生仲尼推太極
老聃貴窈冥西方金仙子崇議乃無明空色皆寂滅業
緣定何成名教信紛藉死生俱未停又云聖人秘元命
懼世亂其真如何嵩公輩詆譎誤時人先天誠為美階
亂禍誰因長城備邊寇羸禍發其親赤精既迷漢子牟

何救秦去去桃李花多言死如麻又云深居觀元化悱
然爭朵頤羣動相啖食利害紛凝凝便便夸毗子榮耀
更相持務光讓天下商賈競刀錐已矣行采芝萬世同
一時又云吾愛鬼谷子青谿無垢氛囊括經世道遺身
在白雲七雄方龍鬪天下久無君浮榮不足貴遵養晦
時文舒可彌宇宙卷之不盈分豈徒山木壽空與麋鹿
羣又云呦呦南山鹿離咎以媒和招搖青桂樹幽蠹亦
成科世情甘近習榮耀紛如何怨憎未相復親愛生禍

羅瑤臺傾巧笑玉杯殞雙娥誰見孤城樹青青成斧柯
又云林居病時久水木澹孤清閒卧觀物化悠悠念無
生青春始萌達朱火已滿盈殂落方自此感歎何時平
又云臨岐泣世道天命良悠悠昔日殷王子玉馬遂朝
周寶鼎淪伊穀瑤臺成古丘西山傷遺老東陵有故侯
又云貴人難得意賞愛在須臾莫以心如玉採他明月
珠昔稱夭桃子今爲春市徒鷗鷺悲東國麋鹿泣姑蘓
誰見鷗夷子扁舟去五湖又云聖人去已久公道緬良

難蚩蚩夸毗子堯禹以為謾驕榮貴工巧勢利迭相干
燕王尊樂毅分國願同歡魯連讓齊爵遺組去邯鄲伊
人信往矣感激為誰歎又云幽居觀大運悠悠念羣生
終古代興沒豪聖莫能爭三季論周赧七雄滅秦嬴復
聞赤精子提劍入咸京炎光既無象晉虜復縱橫堯禹
道已昧昏虐勢方行豈無當世雄天道與胡兵咄咄安
可言時醉而未醒仲尼溺東魯伯陽遁西溟大運自古
來旅人胡歎哉又云逶迤世已久骨鯁道斯窮豈無感

激者時俗類此風灌園何其鄙皎皎於陵子世道不相
容嗟嗟張良公又云聖人不利己憂濟在元元黃屋非
克意瑤臺安可論吾聞西方化清淨道彌敦奈何窮金
玉彫刻以為尊雲構山林畫瑤圖珠翠煩鬼工尚未可
人力安能存夸愚適增累矜智道逾昏又云玄天幽且
默羣議曷嗤嗤聖人教猶在世運久陵夷一繩將何繫
憂醉不能持去去行采芝勿為塵所欺又云蜻蛉遊天
地與世本無患飛飛未能止黃雀來相干穰侯富秦竈

金石比交歡出入咸陽裏諸侯莫敢言寧知山東客激
怒秦王肝布衣取丞相千載為辛酸又云微霜知歲宴
斧柯始青青況乃金天夕浩露霑羣英登山望宇宙白
日已西暝雲海方蕩潏孤鱗安得寧又云翡翠巢南海
雄雌珠樹林何如美人意驕愛比黃金殺身炎洲裏委
羽玉堂陰旖旎光首飾歲華爛錦食豈不在遐遠虞羅
忽見尋多材信為累歎息此珍禽又云挈瓶者誰子妖
服當青春三五月滿盈盈不自珍高堂委金玉微縷

懸千鈞如何負公鼎被奪笑時人又云玄蟬號白露
茲歲已蹉跎羣物從大化孤英將奈何瑤臺有青鳥遠
食玉山禾崑崙見玄鳳宜復虞雲羅又云荒哉穆天子
好與白雲期宮女多怨曠層城閉蛾眉日耽瑤臺樂豈
傷桃李時青苔空萎絕白髮生羅帷又云朝發宜都渚
浩然思故鄉故鄉不可見路隔巫山陽巫山綵雲沒高
丘正微茫佇立望已久涕淚沾衣裳豈茲越鄉感憶昔
楚襄王朝雲無處所荆國亦淪亡又云昔日章華宴荆

王樂荒淫霓旌翠羽盖射兕雲夢林竭來高唐觀悵望
雲陽岑雄圖今何在黃雀空哀吟又云丁亥歲云暮西
山事甲兵羸糧匝邛道荷戟爭羌城嚴冬陰風勁窮岫
泄雲生昏曠無晝夜羽檄復相驚拳跼競萬仞崩危走
九冥籍籍峰壑裏哀哀冰雪行聖人御宇宙聞道泰階
平肉食謀何失蔡霍緬縱橫又云可憐瑤臺樹灼灼佳
人姿碧華映朱實攀折青春時豈不盛光寵榮君白玉
墀但恨紅芳歇凋傷感所思又云竭來豪遊子勢利禍

之門如何蘭膏歎感激自生冤衆趨明所避時棄道猶
存雲淵既已失羅網與誰論箕山有高節湘水有清源
唯應白鷗鳥可為洗心言又云索居猶幾日炎夏忽然
衰陽彩皆陰翳親友各睽違登山望不見涕泣久連沍
宿昔感顏色若與白雲期世中驕豪子驅逐正嗤嗤蜀
山與楚水攜手在何時又云金鼎合神丹世人將見欺
飛飛騎羊子胡乃在蛾眉羣化固幽類芳菲能幾時疲
疴苦淪世憂悔日侵淄蒼然顧幽獨白雲空涕洟又云

朔風吹海樹蕭條邊已秋亭上誰家子哀哀明月樓
自言幽燕客結髮事遠遊赤丸殺公吏白刃報私讐
避讎至海上被役此邊州故鄉三千里遼水復悠悠每
憤胡兵入常為漢國羞如何七十戰白首未封侯又云
本為貴公子平生實愛才感時思報國拔劍起蒿萊西
馳丁零塞北上單于臺登山見千里懷古心悠哉誰言
未忘禍磨滅成塵埃又云浩然坐何暮吾蜀有蛾眉念
與楚狂子悠悠白雲期時哉悲不會涕泣久連沍夢登

綏山穴南采巫江芝探元觀時化遺世從雲螭婉孌羣
永矣感悟不見之又云朝入雲中郡北望單于臺胡秦
何密邇沙朔氣雄哉藉藉天驕子猖狂已復來塞垣無
名將亭堠空崔嵬咄嗟吾何歎邊人塗草萊又云仲尼
探元化幽鴻順陽和大運自盈縮春秋遞來過盲颺忽
號怒萬物相紛廁溟海皆震蕩孤鳳其如何編詩自唐
人有李杜泛浩浩韓柳摩蒼蒼之句余既以此四君子
冠篇首然以輩行歲月較之則陳拾遺在四君子之上

感遇之作雖朱文公命世大儒亦凜然起敬昔摘數聯
今全錄于此

杜子美墓誌云娶弘農楊氏司農少卿怡之女四十九
而終子宗武至死不克葬其子嗣其業後四十餘年乃
克葬于首陽山前長子宗文者傳記乃不言其終豈竟
失學遂無聞歟如樹鷄柵之類必非精文選者太白後
序云娶許生一女二男女曰明月未嫁而卒繼劉次金
次魯生子頗黎終娶宗凡四娶又云攜駿馬美妾所適

二千石郊迎飲數斗世號李東山余記白子名伯禽今
新舊唐史皆不載新史載其二孫女嫁為民妻進止有
風範謂觀察使范傳正言先祖志在青山葬東麓非其
志傳正為改葬青山又欲使二女改妻士族辭以命也
不願更嫁傳正復其夫徭役頗黎豈伯禽之小字歟史

逸其事當考

白與宗十六詩云
晚娶字序訛為宋

世傳退之有題于美墳七言一首末章有三賢所歸同
一水之句此篇出入平仄數韻累三十六句其辭鄙淺

無一字是韓筆韓集李漢所編亦無此篇

元微之作子美墓誌及銘皆高古如云子美上薄風騷
下該沈宋言奪蘇李氣吞曹劉掩顏謝之孤高雜徐庾
之流麗盡古今之體製兼文人之所獨真說得出其評
李杜謂太白壯浪縱恣擺去拘束摸寫物象及樂府歌
詩誠亦差肩子美矣至若鋪陳終始排比聲韻大或干言
次猶數百詞氣豪邁屬對律切李尚不能歷其藩翰況堂
奧乎則抑揚太甚

國初盛稱二何之文苦不多見其序杜詩云公詩友為
六家孟郊得其氣焰張籍得其簡麗姚合得其清雅賈
島得其奇僻杜牧薛能得其豪健陸龜蒙得其瞻博此
數語亦近似但郊謂之得杜氣骨可也烏有所謂焰哉
能詩非牧比不可並稱龜蒙非甚瞻博亦道不著余謂
善評杜詩無出半山吾觀少陵詩謂與元氣侔之篇萬
世不易之論王逢原云雕鎬物象三千首照耀乾坤四
百春雖面前語他人亦不能道

楊大年歐陽公皆不喜杜子美詩王介甫不喜太白詩殊不可曉介甫之說云白詩十句九句說婦人酒耳獨不思命高將軍脫靴識郭汾陽于貧賤時比開元貴妃于飛燕豈說婦人酒者所能為耶晦翁亦云近時詩人未曾夢見太白脚後板

故人陳伯靈愔郎中讀北征詩戲語余云子美善謔如云粉黛亦解苞狼籍畫眉濶雖妻女亦不怨余云公知其一爾別詩云清輝玉臂寒則閨中之膚色玉耀可見

又云何時倚虛幌雙照淚痕乾其篤于伉儷如此伯靈
大笑

李白與裴長史詩云蜀中友人吳指南死于洞庭之上
白禪服慟哭若喪天倫炎月伏屍泣盡繼之以血權殯
湖側自金陵歸數年遺骸猶在白飲泣裹骨徒步負之
而趨丐貸營葬于鄂城之東其自序如此史亦不書

史言明皇欲官太白為妃所沮余觀飛燕在昭陽之語
不足深憾雪讒詩自叙甚詳略云漢祖呂氏食其在旁

秦皇太后毒亦姪荒時妃以祿山為兒史云宮中有醜聲而白肆言無忌如此唐人于玉環事多微婉其辭如云養在深宮人未識又云薛王沈醉壽王醒又云不從金輿惟壽王白獨昌言之可見剛稜嫉惡故坡公疑其所以召怨力士因借此以報脫靴之辱豈飛燕之句能為崇哉

李郭皆唐名將臨淮馭軍嚴士不敢仰視汾陽頗寬大故子美新安吏點兵詩云送行勿泣血僕射如父兄

岳陽樓云昔聞洞庭水今上岳陽樓吳楚東南坼乾坤
日夜浮親朋無一字老病有孤舟戎馬關山北憑軒涕
泗流岳陽樓賦詠多矣須還此篇獨步非孟浩然輩所及
千秋節云寶鏡羣臣得金吾萬國迴衢樽不重飲白首
獨餘哀按子美在天寶間雖獻三賦未嘗一用不過扈
駕入蜀暫為諫官而追懷開元于十九年之後寶鏡羣
臣得金吾萬國迴之句言羣臣皆賜鏡而金吾仗衛萬
里還京獨嘗艱阻末云衢樽不重飲白首獨餘哀公于

唐朝諸公中最疎遠而一念不忘忠愛比陳希烈張均張均兄弟極富極貴乃為唐賊罪不容誅矣

本朝詩僧道潛自號參寥然太白有贈參寥子一篇云白鶴飛天書南荆訪高士五雲在峴山果得參寥子翫髀辭故園昂藏入君門天子分玉帛百官接話言長揖不受官拂衣歸林巒此一僧一道士皆號參寥以先後言則潛為頂冒聊記之以發一笑

新安吏潼關吏石壕吏新婚別垂老別無家別諸篇其

述男女怨曠室家離別父子夫婦不相保之意與東山
采薇出車杜牧詩相為表裏唐自中葉以徭役調發
為常至于亡國肅代而後非復貞觀開元之唐矣新舊
唐史不載者略見杜詩

太白百憂萬憤二篇百憂上崔相國圓者云台星再朗
天網重恢屈法伸恩棄瑕取材卒賴圓力北歸萬憤投
魏郎中不知魏何人乃儕之崔相之列此篇云樹榛拔
桂囚鸞寵鷄語甚新又言兄弟妻子離隔有一門骨肉

金史卷之八
卷九
散百草遭難不復相提攜之句魏必是一志義之士能
恤人患難者當攷

八哀詩如張曲江云仙鶴下人間獨立霜毛整上君白
玉堂倚君金華省如李北海云古人不可見前輩復誰
繼又云碑版照四裔又云豐屋珊瑚鉤騏驎織成罽紫
騮隨劍几義取無虛歲又云獨步四十年風聽九臯唳
子美惟于此二公尤尊且敬如李臨淮云平生白羽
扇零落蛟龍匣極悲壯又云青蠅紛營營風雨秋一葉

內省未入朝死淚終映睫其形容臨淮憂讒畏譏不敢入朝之意說得出餘人如鄭虔之類非無可說但每篇多蕪辭累句或為韻所拘殊欠條鬣不如飲中八仙之警策蓋八仙篇每人只三兩句八哀詩或累二三十韻以此知繁不如簡大手筆亦然

太白求白鵬詩云照影玉潭裏刷毛琪樹間夜淒寒月靜朝步落花間唐人詠白鵬者極少本朝歐梅皆有此作當更求鵬詩以補遺

醉答丁十八云黃鶴高樓已搥碎黃鶴仙人無所依黃
鶴上天訴玉帝却放黃鶴江南歸神明太守再雕飾新
圖粉壁還芳菲一州笑我為狂客少年往往來相譏君
平簾下誰家子云是遼東丁令威作詩調我驚逸興白
雲遶筆窻前飛待取明朝酒醒罷與君爛漫尋春暉丁
十八不知為何人敢與謫仙挑戰豈非任索之流乎

贈岑徵君云岑公相門子雅望歸安石奕世皆夔龍中
台有三折雖登洛陽殿不屈巢由身余亦謝明主今稱

偃蹇臣登高覽萬古思與廣成鄰西來一搖扇共拂元
規塵此篇清拔不書徵君名豈非與子美同為遺補者
乎按京兆杜確序岑參詩言參曾大父文本大父長倩
伯父義皆至台輔則徵君只是此人無可疑者但序云
參天寶三載進士高第歷官至右補闕起居郎入為郎
出為京西判官嘉州刺史不言其嘗被徵召豈偶遺忘
耶

別宗十六云我非東牀人令姊忝齊眉浪迹未出世空

名動京師適遭雲羅解翻作夜郎悲拙妻莫邪劍及此
二龍隨慙君湍波若千里遠從之白帝曉猿斷黃牛過
客遲遙瞻明月峽西去益相思妻與其兄從至夜郎與
集序終娶于宗之說合註家或以宗為宗或以宗為宗
但當以白詩為正

江陵送馬卿云天意高難問人情老易悲惠子云皇天
無老眼空谷滯斯人唐人送山人處士五言多矣此二
聯劉隨州鮑溶輩精思不能逮

小寒食舟中云春水船如天上坐老年花似霧中看此
聯在目前而古今人所未發

天育驃騎歌云伊昔太僕張景順監牧攻駒閱清峻遂

令大奴守天育

天育監中所謂
大奴指王毛仲

別養驪子憐神俊當時

四十萬匹馬張生歎其材盡下故獨寫真傳世人見之
座右久更新年多物化空形影嗚呼健步無由騁如今
豈無騷囊與驂騑時無王良伯樂死即休又題韋偃馬
云韋侯別我有所適知我憐君畫無敵戲拈秃筆掃驂

騶歛見麒麟出東壁一匹斲草一匹嘶坐看千里當霜
蹄時危安得真致此與人同生亦同死少陵馬詩多矣
此二篇及曹霸丹青引尤老蒼一洗萬古

杜鵑行云寄巢生子不自啄羣鳥至今與哺雛雖同君
臣有舊禮骨肉滿眼身羈孤此篇似謂車駕幸蜀六官
莫從萬官竄伏奔問行在者絕少又義鵑行云飄蕭覺
素髮凜欲衝儒冠又云永激壯士肝似謂當時有權位
而不救人之急脫人于難者

前出塞云君已富土境開邊一何多棄絕父母恩吞聲
行負戈又云生死向前去不勞更怒嗔路逢相識人附書
與六親哀哉已訣絕不復同苦辛又云軍中異苦樂主
將寧盡聞又云殺人亦有限列國自有疆苟能制侵陵
豈在多殺傷又云驅馬天雨雪軍行入高山逕危抱寒
石指落層冰間已去漢月遠何時築城還後出塞云千
金買馬鞍百金裝刀頭又云漁陽豪俠地擊鼓吹笙竽
雲帆轉遼海粳米來東吳越羅與楚練照耀臺軀主

將位益崇氣驕凌上都邊人不敢議議者死通衢又云中

夜間道歸故里俱空村惡名幸脫免窮老無兒孫

謂逃祿山

之難者

此十四篇筆力與文選中擬古十九首並驅

太白擬古十三首感興六首文義或不相屬與集中五言古詩絕不類豈貫休之徒效顰耶

望鸚鵡洲云魏帝營八極蟻觀一禍衡黃祖斗筭人殺之受惡名驚鶚啄孤鳳千春傷我情至今芳洲上蘭蕙不忍生此篇有無窮之悲

永王東巡歌內一絕云三川北虜亂如麻四海南奔似
永嘉但用東山謝安石為君談笑靜胡沙按永王辟客
如孔巢父亦在其間白其一爾此篇所謂謝安石不知
屬誰可見自負不淺然十篇只目王為帝子受命東巡
與王衍阮籍勸進者不同

姑孰十詠前單疑非白作信然

越中覽古云越王勾踐破吳歸義士還家盡錦衣宮女
如花滿春殿只今惟有鷓鴣飛蘓臺覽古云舊苑荒臺

楊柳新菱歌清唱不勝春只今惟有西江月曾照吳王
宮裏人二首可入七言絕句

上皇西巡歌云柳色未饒秦地綠花光不減上林紅又
云地轉錦江成渭水天迴玉壘作長安末云少帝長安
開紫極雙懸日月照乾坤時上皇播遷于蜀非欲留蜀
者今盛稱錦江玉壘無異渭水長安又謂雙懸日月照
乾坤若為少帝諱不力請回鑾者此所以上皇有乞我
劍南一道之歎歟

秋浦十七首云秋浦長似秋蕭條使人愁遙傳一掬淚
為我達揚州又云秋浦錦駝鳥人間天上稀山雞羞綠
水不敢照毛衣又云山川如剡縣風日似長沙又云兩
鬢入秋浦一朝颯已衰猿聲催白髮長短盡成絲雖五
言然多佳句

玉壺吟云西施宜笑復宜顰醜女效之徒害身君王雖
愛蛾眉好無奈宮中妬殺人則妃常沮白信而有徵奈
笑歌行悲歌行太淺易欠豪放前輩疑非白作

韋偃雙松圖云天下幾人畫古松畢宏已老韋偃少絕
筆長風起纖末滿堂動色嗟神妙兩株慘裂苔蘚皮屈
鐵交錯迴高枝白摧朽骨龍虎死黑入太陰雷雨垂松
根胡僧起寂寞龐眉皓首無住著偏袒右肩露雙腳葉
裏松子僧前落韋侯韋侯數相見我有一匹好東絹重
之不減錦繡段已令拂拭光凌亂請公放筆為直幹韋
畢之畫今皆不存賴詩以傳內白摧朽骨龍虎死黑
入太陰雷雨垂天造險語盡古松竒怪之狀李尊師松障

歌云更覺良工心獨苦前輩多稱此句

張舍人遺縠段云開絨風濤湧中有掉尾鯨空堂魑魅
走高枕形神清領客珍重意顧我非公卿服飾定尊卑
大哉萬古程今我一賤老短褐更無營煌煌珠宮物寢
處禍所嬰昔聞黃金多坐見悔吝生奈何田舍翁舍此
厚貺情錦鯨卷還客始覺心和平可見子美一介不取
之意

病栢云有栢生崇岡童童狀車蓋偃蹇龍虎姿生當風

雲會豈知千年根中路顏色壞出非不得地蟠據亦高
大歲寒忽無憑日夜柯葉改丹鳳領九雛哀鳴翔其外
鴟鴞志意滿養子穿穴內客從何鄉來竚立久吁怪唐
自闕者力士輔國士良朝恩弄權怙寵元勳老將如汾
陽臨淮西平北平皆凜凜不自安此篇辭不迫切而意
獨至

病橘之作傷微物失所至于困瘁內云常聞蓬萊殿羅
列瀟湘姿此物歲不稔玉食失光輝寇盜尚憑陵當君

減膳時汝病是天意吾諗罪有司言此果每進奉玉
食今以病見廢咎有司失包貢反不若南海荔支歲馳
至長安爾

枯櫟篇云蜀門多櫟櫟高者十八九其皮割剝甚雖衆
亦易朽交橫集斧斤凋喪先蒲柳傷時苦軍乏一物官
盡取嗟爾江漢人生成亦何有有同枯櫟木使我沈嘆
久死者即已休生者何自守註云蜀人取櫟皮以充用
如邊吏誅求江漢民力以供軍必至于刮剝盡而後已

枯枿篇云梗楠枯崢嶸鄉黨皆莫記不知幾百歲慘慘
無生意上枝摩皇天下根蟠厚地巨圍雷霆折萬孔蟲
蟻萃白鵲遂不來天鷄為愁思猶含棟梁具無復霄漢
志良工古昔少識者出涕淚種榆水中央成長何容易
截成金露盤裊裊不自畏以榆本承露盤是以輕承重
豈不裊裊可畏乎註言天材不用而柔脆嵬瑱之材反
居重任

東山吟云攜妓東山去悵然悲謝安我妓今朝如花月

他妓古墳荒草寒白鷄夢後三百歲灑酒澆君同所懽
酣來自作青海舞秋風吹落紫綺冠彼亦一時此亦一
時浩浩洪荒高詠何必奇晉至今且千歲皆以謝公為
風流之宗雖半山崛強金陵諸詩篇篇起敬惟謫仙子
視謝公與之對壘無所推讓時人號為李東山固以李
配謝矣

草書歌云墨池飛出北溟魚筆鋒殺盡中山兔八月九
月天氣涼酒徒詞客滿高堂須臾掃盡數千張飄風驟

雨驚颯颯落花飛雪何茫茫起來向壁不停手一行數
字大如斗怳怳如聞鬼神驚時時只見龍蛇走左盤右
威如驚電狀同楚漢相攻戰王逸少張伯英古來幾許
浪得名張顛老死不足數我師此技不師古古來萬事
貴天生何必要公孫大娘渾脫舞自有草書以來未有
能形容此妙者楚漢數語真可以破鬼膽

遊太山云清曉騎白鹿直上天門山山際逢羽人方瞳
好容顏捫蘿欲就語却掩青雲關遺我鳥迹書飄然落

巖間其字乃上古讀之了不聞感此三歎息從師方未
還又云平明登日觀舉手開雲關精神四飛揚如出天
地間黃河從西來窈窕入遠山凭崖覽八極目盡長空
間偶然值青童綠髮雙雲鬟笑我晚學仙蹉跎凋朱顏
躊躇忽不見浩蕩難追攀又云舉手弄清淺誤攀織女
機明晨坐相失但見五雲飛此六首皆仙人語非學仙
人語亦非任棠輩所敢擬倫丁十八輩所敢挑戰者
嘲魯儒云魯叟談五經白髮死章句問以經濟策茫如

墮煙霧足著遠遊履首戴方山中緩步從直道未行先
起塵秦家丞相府不重褒衣人君非叔孫通與我本殊
倫時事且未達歸耕汶水濱此篇幾予以儒為戲然秦
家丞相府不重褒衣人非謫仙不能道

過彭蠡云謝公入彭蠡因此遊松門余方窺古鏡兼得
窮江源而欲繼風雅豈惟清心寬雲海方助興波濤何
足論水碧或可採金膏秘莫言余將振衣去羽化出羈
煩此篇有陶謝意

與道者談玄云茫茫大夢中惟我獨先覺騰轉風火來
假合作容貌滅除昏疑盡領略入精要朗悟前後際始
知金仙妙公詩多說仙惟此篇兼說金仙

題薛少保畫鶴云薛公十一鶴皆寫青田真低昂各有
意磊落如長人佳此志氣遠豈惟粉墨新赤霄有真骨
豈飲沔池津冥冥任所往脫畧誰能馴又角鷹歌云楚
公畫鷹鷹帶角殺氣森森到幽朔觀者貪愁掣臂飛畫
師不是無心學此鷹寫真在左綿却嗟真骨遂虛傳梁

間燕雀休驚怕亦未搏空上九天此鶴此鷹賴詩而傳
則詩壽于畫矣赤霄有真骨豈飲沔池津之句羽類無
敢當者時人不識角鷹本色而以左綿畫本為真雖梁
間燕雀亦驚怕故卒章有亦未搏空上九天之句

前打魚篇于眾魚中獨云赤鯉騰出如有神又云魴魚
肥美知第一而徐州秃尾漢陰槎頭皆不足數又云既
飽歡娛亦蕭瑟末云君不見朝來割素髻咫尺波濤永
相失後打魚云小魚脫漏不可記半死半生猶戢戢大

魚傷損皆垂頭屈強沙泥有時立東津觀魚已再來主
人罷鱸還傾盃日暮蛟龍改窟穴山根鱸鮓隨雲雷干
戈兵革鬪未已鳳凰麒麟安在哉吾徒胡為縱此樂暴
殄天物聖所哀兩篇末句皆不忍暴殄之意公詩深得
風人之義

催宗文樹鷄柵篇押十八韻頗奇澁欠瀏亮然宗文能
領會非若阿賈之不識字

摘蒼耳篇云江山秋已分林中瘴猶劇哇丁告勞苦無

以供日夕卷耳況療風童兒且時摘侵星驅之去爛漫
任遠適放筐亭午際洗剝相蒙幕登牀半生熟下飭還
小益亂世誅求急黎民糠粃窄飽食復何心荒哉膏粱
客富家厨肉臭戰地骸骨白公雖羈旅奔竄一飲啄間
不忍自求溫飽侵星驅出採摘者不知是畦丁或蒼頭
詩但云童兒往往是宗文兄弟爾

負薪行言夔州俗生男而立女有四五十無夫家者
未云若道巫山女麤醜何得此有昭君村最能行云峽

中丈夫絕輕死少在公門多在水小兒學問止論語大
兒結束隨商旅此鄉之人氣量窄悞競南風疎北客若
道士無英俊才何得山有屈原宅始言夔峽二邦之陋
末以昭君屈原勉勵其土俗公詩篇篇忠厚如此

舞劍器行世所膾炙絕妙好辭也內云先帝侍女八千
人公孫劍器初第一五十年間似反掌風塵瀕洞昏
王室梨園弟子散如烟女樂餘姿映寒日金粟堆南木已
拱瞿塘石城草蕭瑟玳筵急管曲復終樂極哀來月東

出余謂此篇與琵琶行一如壯士軒昂赴敵場一如兒女恩怨相爾汝杜有建安黃初氣骨白未脫長慶體爾

代內云寶刀截流水無有斷絕時妾意逐君行纏綿亦如之又云妾似井底桃開花向誰笑君如天上月不肯一迴照又云窺鏡不自識別多憔悴深安得秦吉了為人道寸心在潯陽非所寄內云多君同蔡琰流淚請曹公諸篇可入五七言絕句

長門怨云天迴北斗挂西樓金屋無人螢火流月光欲

到長門殿別作深深一段愁此篇雖只二十八字然婉
而成章哀而不怨勝長門賦

扶風豪士歌云原常春陵六國時開心露膽君所知堂
中各有三千士明日報恩知是誰四公子之客多鷄鳴
狗吠之徒豈能一一報恩哉羅隱云思量郭隗平生事
不殉昭王是負心郭隗能致樂毅劇辛以報燕昭朱亥
輩恐未能辦

訪范居士失道落蒼耳中見范置酒摘蒼耳云他筵不

下筋此席忘朝饑果茹之品多矣蒼耳微物而李杜皆形之賦詠物之遭遇亦有時耶

題元丹丘五言三篇云松風清襟袖石潭洗心耳又云忽遺蒼生望獨與洪崖郡元丹丘不知何人而白稱之如此丹丘二字觀之恐是天台鴈蕩人然山居在潁陽不可曉當攷

謫仙詩如古風六十三首及樂府諸篇又古律詩舉世誦習者不錄今所採錄或一篇或三數句各有意義覽

者詳之

後村詩話卷九